

Իրրեւ պատասխան իրենց այդ խնդրանքին Միլարայրան հաճեց յայտնել իրենց հետեւեալ երգը.—

Վարպետիս, Տիրոջ, ես մատուցում եմ աղօթքներս:

Գիտէ՞ք դուք, թէ՞ չգիտէք այս վայրերի առաւելութիւնները:

Եթէ դուք չգիտէք այս վայրերի առաւելութիւնները,

Այն ժամանակ ես կը պատմեմ.— Ահա կեապ—պապ Նամ—կաձօնի անապատը. Երկնային այդ ամբողջի պալատի վերը Հարաւի կապտաւուն ամպերն են ժողովում:

Վարը՝ գետ եւ կապոյտ առուակներ են վազում:

Ետեւը, կարմիր ժայռ է՝ երկնային տարածութիւնը,

Իսկ առջեւը՝ փոռած է գոյնզգոյն ծաղիկների կարպետ:

Տեսէք նաեւ —

Ծայրերից, վայրենի դաղանների ոռնոց է լսւում,

Աջ ու ձախ, ահաւոր, թաղաւորական թռչուններ են սուրում,

Երկնքի մէջ թիթեռնիկները վայր են ընկնում մանր անձրեւի նման,

Եւ մեղունները անդադար երգ են երգում: Այդ ամէնը ես տեսնում եմ:

Անասպատ չէ: Ես տեսնում եմ ամէն ինչ: Որովհետեւ այստեղ

Ժամանակի ձայներն են՝ սրտի բարեկամները:

Ու միտքը, ինչպէ՞ս կարող է միտքը ըմբռնել այս վայրերի գորութիւնը:

Եթէ երգը ուրախ սրտից չբխի,

Եւ իմաստութիւնը չըթունքների ծայրին չվառուի:

Հեռաւոր ափից, խուլօրէն հծծող, հովի մի հոսանք խաղում է ջուրի պսպղումի հետ եւ մազերս աչքերիս վրայ ման ածում:

Սրտիս մէջ, Միլարայրան, անձանօթ եւ միամիտ շեշտով երգում է, ու ճեղքուած աչքերով, այծի ճերմակ մօրուքով, ցնցոտիների

տակ դողահար նիհար մարմնով այդ հեռաւոր պատկերը, այս վայրկեանիս, այնքա՞ն ինձ մտերիմ է եւ ա՛յնքան հասկանալի:

«Որովհետեւ այստեղ ժամանակի ձայներն են՝ սրտի բարեկամները»:

Սեւա՛ն, Սեւա՛ն...

* * *

Կղզի գնալու համար — պատմում են — ուխտաւորները կանդ են առնում ափին, ձեռքերը խողովակի նման բոլորում բերանի շուրջը եւ պոռում: Մի ժամ յետոյ, երբ կատարի խոխոցները ժայռերին են կպչում, կղզու առաջաստանաւը սկսում է դանդաղօրէն շարժուել եւ դալիս է հիւրերը փոխադրելու համար:

Նաւը, որ մեզ պիտի տանի Նոր—Բայազետ, դեռ չի եկել, ուստի ժամանակ ունենք այցելել կղզին: Բայց իրրեւ առանձնաշնորհեալ անձնաւորութիւններ մենք հնադարեան առաջաստաներով չենք գնայ, այլ մօթօրով օժտուած նաւակով: Ճիշդ ասած, փոքրիկ մակոյկը, որ մեզ պիտի տանի, շատ էլ ապահով չի երեւում. հին, մաշուած, խարխուլ, ձրկնորսի մի մակոյկ է, որի ետեւի կողմում յարմարացրել են ահազին աղմուկ անող փոքրիկ մի մեքենայ: Երբ մի քանի հոգի նստում ենք մէջը՝ պտուտակը դօր է տալիս, թմբթմբում, պայթոցներ արձակում, ծխում, ջղադրդու կնոջ նման ցատկաւում ու տեղից չի շարժուում: Ճամբորդները նայում են առանց վրաստահութեան՝ բերանը բաց, թթու ժպիտով:

- Բենզինը քի՞չ ա, Ի՞նչ ա...
- Ձէ՛, դատն ա... դա՛տ է եղել...
- Դէ եթէ դատն ա, դա՛տ արէք է՛ր...

Վերջապէս «դատ են անում» եւ մեկնում ենք:

Ճամբու խօսակցութիւններից երեւում է, որ այդ աժան մօթօրի ներկայութիւնը մի տեսակ խորհրդանշանական բնոյթ ունի: Այստեղ, կղզին է, վանքը, «Հին դարը», «Իր մեռած մտայնութիւններով», իր վարդապետներով եւ առաջաստանաւերով, իսկ այստեղ, ահաւասիկ գիտութիւնը, առաջադիմութիւնը եւ լոյսը, լո՛յսը: Այդ խեղճուկ, Եւրոպայի ամէն մի խոնարհ պաշտօնեային մատչելի մեքենան, այստեղ մեծ անձնաւորութիւն է, առան-